

Месяца сентября в 20-й день
Всех святых, в земли Брянской просиявших

На велицей вечерни

На Господи, воззвах: поставим стихов 8 и поем стихиры праздника 3 и святых стихиры, глас 3:

Приидите, православных собори,/ святых, просиявших в пределах Брянских, восхвалим:/ святители и священномученики,/ преподобныя и князи благоверныя,/ мученики и исповедники,/ вкупе именуемая и неименуемая,/ сии бо воистинну дела и словеса и многовидным житием/ и от Бога даровании/ соделашася святии,/ ихже и гробы Бог чудеса прослави./ Ныне же прославльшему их Христу предстоят/ и молятся прилежно о нас,/ любовь совершающих светлое их торжество.

Приидите, Православия ревнителие,/ песнями восхвалим богомудрыя святители,/ в земли Брянской слово Христовы истины право правившия,/ строители таин Божиих,/ священства венцы, благочестия образы,/ Церкви Христовы столпи непоколебимии,/ благоверным людям теплыя пособники/ и молитвенники о душах наших.

Кто от земнородных изречет/ чудная ваша жития, преподобнии отцы?/ Кий же язык изглаголет/ священныя о Дусе подвиги и поты ваша?/ Вы бо в мире явистесь воистину, якоже ангели,/ вся начала тьмы и власти лютыя/ Божиим вспоможением победисте,/ плоть умертвисте и дух оживисте/ и землю Брянскую небо другое сотвористе.

Ины стихиры, глас 8:

Блаженнии богомудрии князие,/ в пределах Брянских благоверно правившии,/ евангельскою мудростию украшеннии,/ светлостию добродетелей блиставшии,/ вы ныне, на Небесех предстояще,/ верных сословие озаряете/ и тьму бесовскую отгоняете./ Темже вас, яко причастники невечерняя благодати/ и земли Брянския хранители непостыдныя,/ почитаем, досточуднии.

Мученицы Христовы преблаженнии,/ земли Брянския красное воспитание,/ страдания нивочтоже вменисте/ и срамоту поношения презресте,/ смерть же, яко приобретение/ жизни вечныя со Христом,/ радостно облобызасте/ и землю кровьюми вашими напоисте,/ воздух же преставлением освятисте,/ и ныне на Небесех о нас молитесь непрестанно,/ боговидцы.

Слава, глас 1:

Веселися о Господе, земле Брянская,/ радуйся и ликуй,
верою Православною обогатившись,/ телеса подвижников и
свидетелей истины/ в недрах своих имущи, яко сокровище,
насладися чудес, от них истекающих,/ и, видящи полк сей святой,
от видимых и невидимых врагов тя ограждающий,/ благодарне
Богу возопий:/ Господи, слава Тебе.

И ныне, праздника.

Вход. Прокимен дне. Чтения три.

Пророчества Исаина чтение (глава 49, 8-15):

Премудрости Иисуса, сына Сирахова, чтение (глава 44, 1-14):

Премудрости Соломоновы чтение (глава 3, 1-9):

На литии стихира праздника и святых стихиры, глас 8:

Срадуйтесь с нами, вси лица святых/ и вся ангельская
чиноначалия,/ духовне совокупльшесе,/ приидем и воспоим
благодарную песнь Христу Богу:/ се бо безчисленный сонм
сродников наших/ предстоит Царю Славы/ и молебне
ходатайствует о нас./ Сии суть столпы и красота веры
Православныя;/ сии учении, и дела, и кровей излиянии/ Церковь
Божию прославиша;/ сии от всех предел земли наша возсияша,/ и
веру Православную в ней/ чудесы и знамении утвердиша,/ и во
иная страны пронесоша,/ апостольски ревнующе;/ инии же
пустыни и грады земли Брянския обительми святыми украсиша,
ангельское житие показующе;/ мнози ругании, и ранами, и лютою
смертию/ от сынов века сего искусишася,/ мнози же и иными
видами,/ во всяцем чине подвизавшесе,/ нам терпения и
злострадания образ подаша,/ и вси вкупе молят ныне Господа/ от
бед избавитися Отечеству нашему/ и всем нам спастися.

Глас 1.

Подобен: О, дивное чудо:

О, дивное чудо!/ Источницы благочестия/ в пределах
Брянских являются/ и путеводители к Небеси святии сродницы
нам бывают./ Веселися, земле Брянская,/ сих отечество земное./
Возопиим, вернии,/ таковыя имуще в бедах заступники:/
блаженнии и святии,/ Бога не престайте о нас молити,/ подающаго
вами земли нашей велию милость.

Слава, святых, глас 6.

Подобен: Все отложше:

О, коль красно собрание ваше,/ личе святоизбранный,/ друзи Христови,/ Бога рачительнии угодницы,/ святии вси, в земли Брянской просиявшии,/ знаемии купно и безыменнии,/ приидите и станите посреде нас невидимо,/ предначинающе торжество и пение/ и сподобляюще даров невещественных/ ваш праздник совершающих светолепно.

И ныне, праздника.

На стиховне стихиры святых, глас 5.

Подобен: Радуйся:

Радуйся, земле Брянская,/ яже древле бе неверна,/ ныне же верою Православною сияющая,/ проповедию святаго Кукши со учеником его Никоном просвещенная,/ тех память усердно сохраняй,/ чада твоя подвизающи/ подражати вере их,/ в мудрования же странна и ложна не уклонятися,/ но благодатию утверждати сердца.

Стих: Господи, Господь наш,/ яко чудно имя Твое по всей земли.

Радуйся, земле Брянская,/ гражданы Небеснаго Царства воспитавшая/ и совершенныя мужи Господеви показавшая,/ иже светила душам нашим явишася,/ яко учении, дела и чудес зарею просияша./ Сих доблести с любовию прославляюще,/ поревнуим добродетелем их,/ молящеся прилежно ко Господу/ даровати нам велию милость.

Стих: Святым, иже суть на земли Его,/ удиви Господь вся хотения Своя в них.

Приидите, Небеснии предстателие наши к нам,/ вашего требующим милостиваго посещения/ и сердца наша радости исполните/ вашими к Богу молитвами,/ чудес источницы,/ любве органи благозвучнии,/ добродетельми украшеннии./ О, соборе святой/ и полче Божественный,/ земли Брянския утверждение/ вы есте воистинну.

Слава, святых, глас 2.

Подобен: Киими похвальными:

Киими похвальными венцы увенчаем заступники наша?/ Престолу Божию ныне предстоящая/ и чисте тех любящих духовно посещающая,/ всех скорбных утешители/ и сущих в бедах прибежище,/ земли Брянския хранители,/ веры истинныя в ней утверждение,/ Православия поборники,/ ихже ради возношение врагов наших Христос низложи,/ имей велию милость.

И ныне, праздника.

На благословении хлебов тропарь святых дважды и праздника единожды.

Тропарь святых, глас 4:

Днесь радостно ликует земля Брянская,/ прославляющи чада своя, Богу угодившия,/ святители и иереи,/ преподобныя отцы и матери,/ благоверныя князи и княгини,/ мученики и исповедники,/ к нимже с любовью возопиим:/ о, соборе святый и полче Божественный,/ земли нашея утверждение вы есте воистинну.

На утрени

На Бог Господь: тропарь праздника дважды. Слава, святых. И ныне, праздника.

По 1-м стихословии седален святых, глас 2:

К милости Источнику, Господу Иисусу, моление теплое принесите, прехвальнии,/ о земли Брянской молящися,/ и от бед избавите нас,/ скорое поможение подающе.

Слава, и ныне, праздника.

По 2-м стихословии седален святых, глас 6:

Днесь Небеса радуются и земля Брянская веселится,/ память святых Твоих, Господи, празднующе,/ тех молитвами помилуй нас.

Слава, и ныне, праздника.

Величание:

Величаем вас,/ вси святии, в земли Брянския просиявшии,/ и чтим святую память вашу,/ вы бо молитесь за нас/ Христа Бога нашего.

Ино величание:

Ублажаем вас,/ чудотворцы наши славнии,/ землю Брянскую добродетельми вашими озарившии/ и нам образ спасения/ светоявленно показавшии.

Псалом избранный:

1 лик: Воскликните Господеву, вся земля, пойте же имени Его, дадите славу хвале Его.

2 лик: Род и род восхвалят дела Твоя и силу Твою возвестят.

1 лик: Яко благоволит Господь в людех Своих и вознесет кроткия во спасение.

2 лик: Сей род ищущих Господа, ищущих Лице Бога Иаковля.

1 лик: Мне же зело честни быша друзи Твои, Боже, зело утвердишася владычества их.

2 лик: Изочту их, и паче песка умножатся.

1 лик: Пойте Богу нашему, яко Царь всея земли Бог, пойте разумно.

2 лик: И исполнится славы Его вся земля, буди, буди.

По полиелеи седален, глас 3:

Радостию совершающе днесь светлое торжество,/ восхвалим угодники Божия, землю Брянскую евангельским благовестием огласившия,/ тии бо, якоже древле праотцем нашим, тако и нам взывают ныне:/ приидите, обретохом Спаса душ наших.

Слава, и ныне, праздника.

Степенна, 1-й антифон 4-го гласа. Прокимен, глас 4:

Радуйтесь, праведнии, о Господе,/ правым подобает похвала.

Стих: Буди, Господи, милость Твоя на нас, якоже уповахом на Тя.

Всякое дыхание: Евангелие от Матфея, зачало 10.

По 50-м псалме стихира, глас 6.

Подобен: Отчаянная:

Творение святителя Афанасия, епископа Ковровского

Отчаянни есмы/ жития ради/ и не имамы нрава добродетельна,/ яко миро, приносим Ти, Господи,/ молитвы святых сродников наших./ Не отвержи Русь издревле Святую,/ ныне же грехов наших ради люте страждующую./ Не презри слезы верных сынов,/ колен своих пред Ваалом не преклонявших/ и ихже не поразил еси, согрешающих./ Приими нас, кающихся, Боже,/ святых Твоих мольбами.

Канон праздника, глас 8. И святых канон, егоже краегранесие: Заступники земли Брянския верою чтим. Глас 4.

Песнь 1

Ирмос: *Моря чермную пучину/ невлажными стопами,/ древний пешешествовав Израиль,/ крестообразныма Моисеовыма рукама,/ Амаликову силу в пустыни победил есть.*

Земли Брянския прозябения, Церковию Православную воспитанная,/ во благочестии просиявшия Божественныя отцы и матери наша/ в песнях духовных согласно воспоим.

Священномученика Кукшу со учеником его Никоном восхвалим,/ землю Брянскую проповедию Евангелия просветившия/ и ныне купно Святей Троице предстоящая.

Славу княжения и отечество Христа ради оставив,/ преподобне отче наш Николо, Святоша именуемый,/ вечное Царство и славу на Небеси приял еси,/ идеже, ликуя, поминай верою чтущих тя.

Богородичен: Ты еси, Богородице, оружие наше и стена, и Святей Руси Заступница,/ к Тебе ныне прибегаем, Тя на молитву призываем,/ да избавиши нас от врагов наших.

Песнь 3

Ирмос: *Веселится о Тебе Церковь Твоя, Христе, зовущи:/ Ты моя крепость, Господи,/ и прибежище, и утверждение.*

Убийц жестосердых, незлобиво муки претерпев,/ победитель явился еси, княже Игорю,/ темже благодать стяжал еси от междоусобных брани избавляти.

Приидите, воспоем мученика Михаила, князя Черниговскаго,/ с боярином верным Феодором,/ исповедания венцы украсившихся.

Небесное Царство восприим трудами и молитвами,/ Феодоре, княже Смоленский,/ оружием молитв твоих и ныне Отечество наше охраняй.

Богородичен: Имамы образ Твой, Благая Одигитрие, в Чубковичах сияющий,/ знамение милости Твоея и в скорбех утешение,/ и чудес источник, Пречистая.

Кондак и икос праздника.

Седален святых, глас 7:

Нощней тьме огустевающей, умножается звездное блистание,/ и к тому очи заблудших радостно возводятся./ Тако и умножившейся на земли тьме греховней,/ возведем горе очи наши, братие,/ и, сияние духовных звезд, землю нашу озаряющих, узревше,/ к Небесному отечеству потщимся,/ егоже да не лишит Господь нас, грешных, молитвами святых Своих.

Слава, и ныне, праздника.

Песнь 4

Ирмос: *Вознесена Тя видевши Церковь на Кресте,/ Солнце Праведное,/ ста в чине Своем,/ достойно взывающи:/ слава силе Твоей, Господи.*

Киими словесы прославим князи благоверных, иже, благочестием и верою просиявше, землю Брянскую добре управиша и обителями иноческими украсиша.

Изшел еси, яко воин Христов, на враги невидимыя, преподобне княже Олеже,/ и во обители, тобою созданней, добре подвизався,/ нам мощи твоя святыя оставил еси.

Звезду Суждальскую, от Чернигова возсиявшую,/ невесту Христову, инокинем наставницу,/ Евфросинию преподобную любовию да ублажим.

Богородичен: Егда обыдоша град Брянск супостаты,/ тогда благодатию Свенскаго Твоего образа, Пречистая, тех вспять обратила еси/ и многия ины чудеса от иконы Своя явила еси.

Песнь 5

Ирмос: Ты, Господи, мой Свет,/ в мир пришел еси,/ Свет Святый, обращающа из мрачна неведения/ верою воспевающа Тя.

Моли Бога о нас, святителю Феогносте, Московский чудотворче,/ мудрость со благочестием в житии сочетавый и благословение свое земли Брянской даровавый.

Любве и смирения сокровище,/ подвигов иноческих зеркало,/ правило веры и благочестия явился еси, святителю Феодосие Черниговский,/ темже Бог тя дивным нетлением и чудеса мощей твоих прослави.

Иоанна, святителя Тобольскаго, усердно воспойм,/ той бо, от Свенския обители изшед,/ Сибирския страны светильник явился/ и апостольскою ревностию и милосердием к страждущим прославися.

Богородичен: Балыкинскою и Молченскою, и Чолнскою иконами Твоими пределы Брянския освящаеши, Пречистая,/ и помощь неоскудную притекающим к ним присно источаеши.

Песнь 6

Ирмос: Пожру Ти со гласом хваления, Господи,/ Церковь вопиет Ти,/ от бесовския крове очищися,/ ради милости из ребр Твоих/ истекшею Кровию.

Ратниче дерзновенный брани Куликовския,/ игумена Земли Русския послушниче смиренный,/ Александре Пересвете, страдальче мужественный,/ Брянскую землю, отечество твое, заступай.

Яко светильник дивный в дебри Брянской явился еси, преподобне Поликарпе,/ мудрование бо и славу мирскую презрев,/ Божественным заповедем неленостне последовал еси.

Несумненно вся красная мира сего оставил еси, преподобне Поликарпе,/ пощением и слезами, молитвами и песньми

устремляясь к Богу,/ и обитель иноческую во имя Спаса нашего во граде Брянске создал еси.

Богородичен: Споручнице грешных, Всепетая Владычице,/ икону Твою в Одринной обители чудесы прославившая,/ яко Мать Божия, умоли Твоими молитвами Избавителя всех,/ да спасет души наша.

Кондак, глас 2:

Заступницы теплии Брянския земли,/ святии сродницы наши,/ купно с Пресвятою Богородицею и всеми святыми/ Престолу Божию ныне предстояще,/ молитвами вашими Православие утвердите,/ ереси и расколы разорите,/ Отечеству нашему мир/ и душам нашим полезная испросите.

Икос:

Едемскаго рая дерева доброплодная и красная явишася, святии,/ цветы благовонныя учений и плоды дел творящии,/ от нихже души наша питаются и глад наш духовный утоляется,/ приидите убо, притецем под сень их и ублажим,/ яко земли Брянския отраду и украшение, образ жития и начертание,/ и к ним с любовью возопиим:/ о, блаженнии сродницы наши,/ молитвами вашими Православие утвердите,/ ереси и расколы разорите,/ Отечеству нашему мир/ и душам нашим полезная испросите.

Песнь 7

Ирмос: *В пеци Авраамстии отроцы персидстей,/ любовью благочестия паче,/ нежели пламенем опаляеми зываху:/ благословен еси в храме славы Твоея, Господи.*

Крестителю Иоанну ревностию уподобился еси, Феодоре преподобне,/ от юности Богу угодив и скорби Его ради претерпев,/ обители Площанския воспитание и Санаксарскаго вертограда иноческаго похвало,/ моли спастися нам.

Имамы преподобных Василиска Сибирскаго и ученика его Зосиму Верховскаго,/ в Брянских дебрех начало подвигов положивших,/ яко образ послушания и пустыннолюбия,/ и о спасении ближних попечения.

Явишася народа Божия печальницы доблии,/ преподобнии старцы Оптинстии Льве, Макарие и Моисее,/ в обителях Брянских подвизавшиися,/ и нас на путь покаяния, смирения и терпения наставите.

Богородичен: Владычице Богородице,/ цельбоносною Твоею иконою, Троеручицею именуемою,/ Пустынь Белобережскую

украшившая,/ прости всемогущую Твою руку на помощь православно Тя величающим.

Песнь 8

Ирмос: Руце распротер Даниил,/ львов зияния в рове затче:/ огненную же силу угасиша,/ добродетелию препоясавшися,/ благочестия рачители отроцы, взывающе:/ благословите, вся дела Господня, Господа.

Егоже носил еси в сердце твоём, Слова Христа Бога,/ моли за ны, святителю Игнатие богомудре,/ Православия поборниче, покаяния и молитвы наставниче,/ архиереев украшение и монашествующих похвало.

Радуйтесь, священномученицы славнии Александре, Иоанне, Митрофане, Алексие и Корнилие, во дни гонений безбожных веру соблюдшии и даже до крове Христа ради пострадавшии.

Архипастыри земли орловския, мученическою кровию украшенная, согласно воспоим:/ Серафима митрополита, прославлению Саровскаго чудотворца послужившаго,/ и другаго Серафима добробеднаго,/ и добляго Макария.

Богородичен: Юже воспевают ангели, прославим ныне Заступницу Усердную,/ икону Свою обители Площанской и всей земли Брянской в покров и ограждение даровавшую.

Песнь 9

Ирмос: Камень нерукосечный/ от несекомыя горы, Тебе, Дево,/ краеугольный отсечеса, Христос,/ совокупивый разстоящаяся естества,/ тем, веселящеса, Тя, Богородице, величаем.

Честныя иерархи, Стародуба славу,/ Дамаскина ревностнаго, за Христа смерть приемшаго,/ и кроткаго Николая, в Казахской земли исповеднический путь скончавшаго,/ молитвенники о нас ко Спасу приводим.

Твердо Православную веру, яко щит держаще, святии страстотерпцы земли Брянския,/ злобу лютых отступников и безбожных наглое неистовство препобедили есте/ и нам образ терпения и злострадания явили есте.

Именованныи и безыменнии, явленнии и неявленнии, святии сродницы наши,/ славу многу от Бога приимшии,/ утверждение в Православии и мир Отечеству нашему испросите/ и спасение душам нашим.

Богородичен: Мати Божия Пречистая,/ грады и веси земли Брянския честнаго лика Твоего изображении милостивно обогатившая,/ благодарение наше приими/ и от всякаго зла покрый Отечество наше.

Светилен святых:

В песнех восхвалим светила незаходима Бряньския земли,/ таинники Божественнаго Слова,/ Христа славяще, сих просветившаго и возлюбившаго,/ и помощники нам в скорбех даровавшаго.

Слава, и ныне, праздника.

На хвалитех стихиры праздника и святых стихиры, глас 4.

Подобен: Дал еси знамение:

Дал еси знамение/ святым, боящимся Тебе, Господи,/ Крест Твой Честный,/ имже тии, посрамивше начала и власти тьмы,/ на Бряньской земли Православие утвердиша./ Темже Твое человеколюбное смотрение славим,/ Иисусе Всесильне,/ Спасе душ наших.

Дал еси нам, яко образ мужества и терпения,/ святыя вся земли нашея,/ благоугодившия Тебе, Господи,/ благия и верныя рабы Твоя,/ ихже слезами, подвиги и поты,/ кровьми и учением/ Отечество наше утвердися./ Тех молитвами,/ Иисусе Всесильне,/ спаси души наша.

От Божественныя благодати подвигшися,/ честныя отцы наша/ сынолепно да восхвалим,/ тии бо безстрастием души и ума чистотою,/ нравом кротким и благочестием/ даже до крове и смерти мучителем противосташа/ и Христу присвоишася,/ Спасу душ наших.

Слава, святых, глас 8.

Подобен: О, преславнаго чудесе:

Благодарным сердцем и усты/ хвалим Тя, Многомилостиве Господи,/ дивен бо явился еси во святых Твоих,/ в земли Бряньской богоугодне подвизавшихся,/ ихже предстатели нам даровал еси/ и в нуждах заступники./ Тем, ныне совершающе память их,/ покланяемся державе Твоей, поюще:/ Троице Святая, слава Тебе!

И ныне, праздника.

Славословие великое. И отпуст.

На Литургии

Блаженны от праздника, песнь 8-я, на 4, и святых на 4.
Прокимен, глас 4: Святым, иже суть на земли Его,/ удиви Господь

вся хотения Своя в них. Стих: Сохрани мя, Господи, яко на Тя уповах. Апостол ко Евреем, зачало 330. Аллилуиа, глас 4: Боже, ушима нашими услышахом, и отцы наши возвестиша нам. Стих: Спасл бо еси нас от стужающих нам и ненавидящих нас посрамил еси. Евангелие от Матфея, зачало 11. Причастен: Благоволит Господь в людех Своих и вознесет кроткия во спасение.

Молитва

О, всеблаженный и богомудрый угодницы Божии, подвиги своими землю Брянскую освятившии и телеса своя, яко семена веры, в ней оставльшии, душами же своими Престолу Божию предстоящи и непрестанно о ней молящиися!

Се ныне, в день общаго вашего торжества, мы, грешнии, земнии сродницы ваши, дерзаем приносить вам сие хвалебное пение. Величаем ваша великия подвиги, духовнии воины Христови, терпением и мужеством до конца врага низложившии и нас от прелести и козней его избавляющии. Ублажаем ваше святое житие, светильницы божественнии, светом веры и добродетелей светящиися и наша умы и сердца богомудренно озаряющии. Прославляем ваша великая чудеса, цветы райстии, в стране нашей прекрасне процветшии и ароматы дарований и чудес повсюду благоухающии. Восхваляем вашу богоподражательную любовь, предстателие наши и покровителие, и, уповающе на помощь вашу, припадаем к вам и вопием: просветителие наши! Споспешествуйте людем Брянския земли завещанную вами веру Православную твердо содержать, да спасительное семя, вами всеянное, не изсушено будет зноем неверия, но, дождем благодати Божия напоенное, плод изобильный да принесет.

Святителие Христови! Молитвами вашими утвердите Церковь Русскую, ереси, расколы и нестроения в ней потребите, расточенныя овцы во едино соберите и от всяких волков, во одежди овчей в стадо Христово входящих, оградите.

Преподобнии отцы! Сохраните нас от прелестей мира сего лукаваго, да, отвергшися себе и взявше крест свой, последуем Христу, распинающе плоть свою со страстьми и похотьми, носяще тяготы друг друга.

Благовернии князие! Воззрите милостивно на земное Отечество ваше и вся нечестия и соблазны, в нем ныне сущия, оружием молитв ваших потребите, да, якоже древле, тако и ныне и

в грядущее время, прославляется на святей земли нашей Имя Господне.

Страстотерпцы преславнии! Укрепите нас в мужественном стоянии даже до крове за веру Православную и обычаи отеческия, да ни скорбь, ни теснота, ни гонения, ни глад, ни нагота, ни беда, ни меч возмогут нас разлучити от любви Божия, яже о Христе Иисусе, Господе нашем.

Богомудрыя жены, в немощнем естестве подвиги велия явившия! Молитесь, да дух ваша любовь ко Господу и ревность о угождении Ему и о своем и ближняго спасении не оскудеет в нас.

Вси святии сродницы наши, от лет древних просиявшии и в последния дни подвизавшиися, явлении и неявлении, ведомии и неведомии! Посетите нашу немощь и уничижение и молитвами вашими испросите у Христа Бога нашего, да и мы, безбедно преплывше пучину житейскую и невреديمо соблювше сокровище Православныя веры, пристанища вечнаго спасения достигнем и в блаженных обителех Горняго Отечества вкупе с вами и со всеми угодившими Ему от века святыми водворимся благодатию и человеколюбием Спасителя нашего Господа Иисуса Христа, Емуже со Превечным Отцем и Пресвятым Духом подобает непрестанное славословие и поклонение от всех верных во веки веков. **А**минь.

Празднование установлено 5 декабря 2003 года по благословению патриарха Алексия.

На 2007 год были известны 43 святых, чьи жития связаны с Брянской землей. В Брянской епархии образован отдел Агиологии, который систематизирует материалы. Постепенно Собор Брянских святых будет пополняться новыми именами.

В Собор входят:

- Сщмч. Кукша Печерский, иером. (+ после 1114, память 27 августа)
- Мч. Никон Печерский, ученик прп. Кукши (+ после 1114, память 27 августа)
- Блгв. кн. Давид Черниговский (+ 1123)
- Прп. Никола Святоша, Черниговский, Печерский, князь, инок, в Ближних (Антониевых) пещерах (+ 1143, память 14 октября)
- Блгв. Игорь Ольгович, Черниговский и Киевский, вел. князь, чудотворец: (+ 1147, память 5 июня, 19 сентября)
- Мчч. кн. Михаил Всеволодович Черный и боярин Феодор, Черниговские (+ 1245, память 14 февраля, 20 сентября)
- Прп. Евфросиния Суздальская, княжна (+ 1250, память 18 сентября, 25 сентября)
- Прп. Олег Брянский, князь (+ ок. 1285, память 20 сентября)
- Блгв. Роман Брянский, князь Черниговский и Дебрянский (+ после 1288)
- Блгв. Феодор Ростиславич Черный, Смоленский, Ярославский, князь, чудотворец (+ 1299, память 5 марта, 22 июня, 19 сентября)
- Свт. Феогност Киевский и Московский, митр. (+ 1353, память 14 марта)
- Прп. Александр Пересвет, схимон., воин (+ 1380, память 7 сентября)
- Прп. Тихон Карачевский (XVI в.)
- Прп. Поликарп Брянский, игум. (+ 1620-1621, память 23 февраля)
- Свт. Феодосий Угличский, архиеп. Черниговский (+ 1696, память 5 февраля, 9 сентября)
- Свт. Иоанн Тобольский, митр. (+ 1715, память 10 июня)
- Свт. Филофей Тобольский (в схиме Феодор), митр. (+ 1727, память 31 мая)

- Прп. Феодор Санаксарский (+ 1791, память 19 февраля, 21 апреля)
- Прп. Василиск (Гаврилов), Туринский (+ 1824, память 29 декабря)
- Прп. Зосима (Верховский), схимон. (+ 1833, память 24 октября)
- Прп. Лев Оптинский, иеросхимон. (+ 1841, память 11 октября)
- Свт. Филарет (Амфитеатров), в схиме Феодосий, митр. Киевский (+ 1857, память 21 декабря)
- Прп. Макарий Оптинский, иеросхимон. (+ 1860, память 7 сентября)
- Прп. Моисей Оптинский, схиархим. (+ 1862, память 16 июня)
- Свт. Игнатий (Брянчанинов), еп. Кавказский (+ 1867, память 30 апреля)
- Прп. Иона (Мирошниченко), в схиме Петр, архим., Киевский (+ 1902, память 9 января)
- Сщмч. Макарий (Гневушев), еп. Вяземский (+ 1918, память 22 августа)
- Сщмч. Василий (Богоявленский), архиеп. Черниговский (+ 1918, память 14 августа)
- Сщмч. Дамаскин (Цедрик), еп. Глуховский (+ 1937, память 2 сентября)
- Сщмч. Серафим (Василенко), протодиак. (+ 1937, память 30 сентября)
- Сщмч. Александр (Левицкий) прот. (+ 1937, память 24 ноября)
- Сщмч. Алексей (Тютюнов), иерей (+ 1937, память 24 ноября)
- Сщмч. Иоанн (Никольский), иерей (+ 1937, память 24 ноября)
- Сщмч. Корнилий (Удилович), иерей (+ 1937, память 24 ноября)
- Сщмч. Митрофан (Корницкий) прот. (+ 1937, память 24 ноября)
- Сщмч. Варлаам (Попов), прот. (+ 1937, память 25 ноября)
- Сщмч. Серафим (Остроумов), архиеп. Смоленский (+ 1937, память 25 ноября)

- Сщмч. Серафим (Чичагов), митр. Тверской (+ 1937, память 28 ноября)
- Сщмч. Григорий (Фаддеев), иерей (+ 1937, память 13 декабря)
- Сщмч. Стефан (Грачев), иерей (+ 1938, память 25 января)
- Сщисп. Николай (Могилевский), митр. Алма-Атинский (+ 1955, память 26 августа, 12 октября)

Использованные материалы

- *Собор Брянских святых*, сайт церковного календаря Русской Православной Церкви:
 - <https://mospat.ru/calendar/sobor1/brya.html>
 - Рубрика на сайте *Православной энциклопедии*:
 - <http://www.pravenc.ru/rubrics/128845.html>